

خطِ یهودا

دُعا و سلام

۱ از طرفِ یهودا غلامِ عیسیٰ مسیح و برارِ یعقوبِ بلده کوی شده های که دَ نظرِ خُدا یعنی آتِه آسمانی دوست-دشتمنی آسته و دَ عیسیٰ مسیحِ حَفِظِ شُدِه: ۲ رَحمت، سَلامتی و مَحَبَتِ پَریمو نَصیبِ شُمو شُنِه.

باخبر کدو دَ باره مردُمایِ بے خُدا

۳ ای عزیزا، ما کلو شوقِ دَشتم دَ باره نجاتی بلده شُمو نوشته کُنم که پگ مو دَزو شَریکِ آستی، مگم دَ عینِ وخت لازم دَنستم که چند خطِ نوشته کده شُمو ره تشویقِ کُنم تا دَ باره ایمانی که یگ بار بلده همیشه دَ مُقَدَّسین دده شد، سخت کار کُنید. ۴ چون بعضی کسا تاشکی دَ بینِ شُمو جای گِرَفته که از قدیم محکومیتِ ازوا پیش‌بینی شده. اونا مردُمایِ بے خُدا آسته که پیغامِ فیضِ خُدايِ مو ره بلده فسق-و-فساد خُو کَج معنی مونه و یگانه بادار و مولایِ مو عیسیٰ مسیح ره انکار مونه.

۵ اگرچه شُمو ازی چیزا باخبر آستید، ولے میخایم دَ یاد شُمو بیرم که خُداوند قومِ اسرائیل ره از سرزمینِ مصر نجات دد، مگم بعد از یگ زمان کسای ره که ایمان نورد نابود کد. ۶ امی رقمِ ملایکه های که مقام خُو ره نگاه نکد، بلکه جایگاهِ مُناسِبِ خُو ره ایله کد، خُدا اونا ره دَ زنجیرایِ ابدی دَ تریکی تیره بلده قضاوت دَ روز بزرگ نگاه کده. ۷ دَ امزی رقمِ سدوم و عموره و آغیلایِ گردویر شی که مثلِ ازوا خود ره تسلیمِ فسادِ اخلاقی کد و پُشتِ جنسِ غیرِ طبیعی رفت، دَ عنوانِ نُمونه عبرت دَ آتشِ ابدی سوخته و جزا دیده موره.

۸ لیکن باوجودِ ازی، امی کسای ام که خاو دیده موره، جسمِ های خُو ره نجس مونه و قُدرت-و-اختیارِ الهی ره رد کده دَ ضِدِ حُکمرانایِ آسمانی کُفرگویی مونه، ۹ دَ حالیکه حتیِ میکائیلِ ملایکه اعظم، وختیکه دَ باره جسدِ موسیٰ قد اِبلیسِ جر-و-بحثِ موکد، جُرأت نکد که او ره محکوم دَ کُفرگویی کُنه، بلکه گُفت: "خُداوند تُو ره سرزنش کُنه!" ۱۰ لیکن ای مردُم دَ ضِدِ چیزایِ که نُموفامه بدگویی مونه و چیزایِ ره ام که رقمِ حیوانایِ بے وقوفِ طبیعتاً موفامه، دَ وسیله ازوا نابود موشه. ۱۱ وای دَ حالِ ازوا، چراکه اونا دَ راهِ فائن^۱ رفته و خودون ره بخاطرِ فایده دَ گُمراهیِ بِلعام^۲ گِرِفتر کده و دَ یاغیگریِ قورح^۳ نابود شُدِه. ۱۲ امی آدما دَ مهمانیِ های پُر مَحَبَتِ شُمو رقمِ مار های مَنِه آستین^۴ آسته که بے پروا قد شُمو سرِ دسترخو شسته خودون ره سیر مونه. اونا مثلِ اُور های بے بارشِ آسته که دَ وسیله باد بُرده موشه؛ اونا رقمِ درختایِ تیرماهی بے میوه آسته که کاملاً مُرده و از ریشه کنده شُدِه. ۱۳ اونا جلپه های سرکشِ دریا آسته که رسواییِ خُو ره رقمِ قف آلی باله بُر مونه و ستاره های سرگردو آسته که تریکی تیره تا ابد بلده ازوا مقرر شُدِه.

۱۴ دَ باره امزیا حَنوخ هفتُمینِ نسلِ آدمِ پیشگویی کده گُفت: "اینه، خُداوند قد هزاران هزار مُقَدَّسین^۵ خُو مییه" ۱۵ تا دَ بِلِه پگِ قضاوتِ کُنِه و تمام بے خُداها ره بخاطرِ تمامِ کارایِ بے خُدایی که اونا دَ مُطابِقِ بے خُدایی خُو کده و بخاطرِ پگِ

۱ ۸:۱ «حُکمرانایِ آسمانی» امکانِ ذره «ملایکه های بَشه که دَ شیطو تعلقِ ذره.» ۱۲:۱^b دَ جای «مار های مَنِه آستین» دَ زیونِ یونانی «قاده های تاشه شُدِه» نوشته یه که امی قاده ها دَ زیرِ آو دریا تاشه یه و اکثرِ وختا کشتی ها ره غرقِ مَوکُنِه. ۱۴:۱^c امکانِ ذره که «مُقَدَّسین» ملایکه ها بَشه.

۲ ۱۱:۱ پیدایش ۴. ۱۱:۱ عَددها ۲۲-۲۵. ۱۱:۱ عَددها ۱۶. ۱۴:۱ مَرَقَس ۸:۳۸.

تورای زشت که گناهکارای بے خُدا دَ ضِدِّ اِزُو کُفْتَه، محکوم کُنه. ” ۱۶ امیا کسای آسته که نِقِ نِقِ و شِکایتِ مُونَه و مُطابِقِ خَاهِشَاتِ نَفْسِ خُو رِفْتارِ مُوکُنه. امیا تورای کُنه کُنه مُوگیه و دَ پِیشِ مَرْدُمِ بَخاطِرِ فایِدَه خُو چاپلُوسی مُوکُنه.

اخطار ها و نصیحت های آخر

۱۷ مگم شُمو آی عزیزا، تورای ره که رَسولای مَولای مو عیسیٰ مسیح پیشگویی کد دَ یاد دَشته بَشید، ۱۸ چُون اونا دَز شُمو کُفته: ” دَ زَمَانِ آخِرِ مَرْدُمای رِیشخَندگر مییه که مُطابِقِ خَاهِشَاتِ بے خُدایی خُو رِفْتارِ مُونَه. ” ۱۹ امیا کسای آسته که دَ مینکل شُمو تفرقه میندزه؛ امیا مَرْدُمای نَفسانی آسته که رُوحِ خُدا دَز شی و جُود نَدَره.

۲۰ مگم شُمو، آی عزیزا، خودون ره دَ و سِبیلَه ایمانِ بے اندازه مَقَدَّس خُو آباد کُنید و دَ هِدایتِ رُوحِ اَلْقُدس دُعا کُنید ۲۱ و خودون ره دَ مَحَبَّتِ خُدا نِگاه کده چیم دَ راهِ رَحمتِ مَولای مو عیسیٰ مسیح بَشید که شُمو ره دَ زِندگی اَبَدی راهنُمایی مُونَه. ۲۲ دَ حَقِّ کسای که دِل-و-نادِل آسته دِلسوز بَشید. ۲۳ بعضی ها ره از آتِش بُر کده نِجات بَدید؛ دَ بعضی های دِیگه قد ترس مِهْربانی کُنید، لیکِن دَ عَینِ حال، از کالای که قد جِسم های ازوا اَلْوَدَه شُدَه نَفَرَت کُنید.

حمد-و-ثنا دَ خُدا

۲۴ آلی دَ خُدای که مِیْتَنه شُمو ره از اُفتَدو نِگاه کُنه و شُمو ره بے عیب و خوشحال دَ حُضُورِ پُر جلال خُو قرار بَدیه، ۲۵ یعنی دَ خُدای یکتا و نِجات دِهنده مو، دَ و سِبیلَه عیسیٰ مسیح مَولای مو، از اَزَل تا اَلی و تا اَبَد اَلاباد، بُزُرگی-و-جلال، شِکوه، قُدرت و اِختیار باد. آمین.